

友

聲

集

鐵盂居士存稿卷上

儀真汪全泰大竹著 鴛湖王 相惜菴輯

榕樹樓秋望借周大幼海作

萬木臨深潭危樓拱平楚曙色涵青冥秋光淡容與高
人厭塵囂逸興得儔侶鑿險窮雲根訪異叩巖戶撼撼
蘿洞高側側石梯古忽忽間雞犬稍稍見廊廡曠苑天
沈寥虛庭日卓午殺氣幽旌旗陰煙羃樽俎羅窗挂飛
塵畫壁涸餘雨蕉露吹簷燈松風韻壇鼓轉逕通林皋
孤亭背場圃瓦簾呼白蛭砌蘚竄蒼鼠怪魚谿叟射異
果山童煮秋深無客來地勝有僧主抱真愜淨境參元

樂靈宇黃昏望高原微月照百堵星居雜猺獐火種有
禾黍頽唐風物悲寂寞謳吟苦他鄉感歲時撫事增歎
無

舟次鬱水

赤日銜雲臥江底倒射黃波溼舳尾蒼雷注地飛紫星
龍子繞煙呼百靈青桂紅蕉滿沙渚搖蕩江風半天雨
古穴蠻燈十丈高猺人夜起浚空語萋萋月氣成餘霞
老魚夜食勾漏砂腥涎滴綠掃不去明日石牀生毒花

邕州

鯖魚抱卵眠江沙鷓鴣曉入桄榔花黎歌啞啞打銅鼓

火田冬綠多人家山邊月黑下漁艇寒星射光照人影
夜半沿灘響竹弓往來遙護丹砂井

古城行

蒼江拍拍春水生野逕絕高通古城崩榛敗瓦少人跡
老雉撥沙成雨聲城下寒煙沒亭戍黎母爭田晝焚樹
飛火山頭墮黑巢猩猩唬熱穿雲去

觀蠻樂作

荒服習神怪居民尙歌舞椎髻吹虛沙跣足相銃鼓銅
龍噴霧波布獸超煙炬蒼精唬鍊刀紅光格飛弩日暮
栖寒雲風迴雜飛雨岩口散戍兵木末下蠻女急景凋

華年異樂感邊土心期在幽寄奇目聊容與

上林縣

晨光滿山縣春氣有谿霞過水波羅樹當船吉貝花暖
風嘯鬼蜨腥雨戲天鰕更向蠻村宿泥爐試洞茶

初入土州

絕域衣冠少羈州版籍稀波聲聞鼻飲

鼻飲

星影見頭

飛飛頭

竹釜炊蛇熟銀砂飼蠱肥天南風俗異歌詠覺

全非

田州

族胄原岑祀提封藉狄青軍書傳遞甲民賦比租丁客

問金蠶法官言彖耳靈尹珍如可作應解習圖經

剝塞

荒城連嶺去飛觀接江高毒雨升龍鬬蠻雲偃象交山
民淘古辣谿婦射思牢尙有侏離舞黃公咒赤刀

田陽

紅旗青纜下牂牁烏滸春深碧瘴多象跡翻雲騰古壑
蛟涎吹雨入荒河東風早見桄榔熟南客虛傳蕙苳過
寂寞邊關懷往事瀾滄淒絕漢時歌

馱蒙江接夜郎天畫鼓清饒下水船海雀飛還生暮雨
瘴花開盡減春煙邊兵唱漏谿中出蠻吏司燈洞口眠

間道邛州炎火地捕魚操管是何年

盤江行

盤江水力秋弦直兩澗夾江流不入蒼崖橫出排神功
倒蹴波濤高十尺青銅擊沓奔孤雷東來瀑布如龍飛
森然翻石射雲外昨夜山根蛟子歸漁舟逆上盤渦急
側過清潭網重集驚魚衝浪不能去江底啣沙向人立
我經險絕悲心魂鼉喧蚊聒愁黃昏已幸艤舟近赤坂
何期驅熱煩風門三更露下檣燈滅遙見舟人渡頭歇
蠻語侏儻隔水聞篷窗獨臥疎林月

蠻寺

蠻寺青峰裏深松掩夕曛虎遶潭上雨鷹下殿中雲紫
瓦封唐鼓丹碑勒宋文淒涼舊經閣重拜狄將軍

舊州

侵晚發田陽向夕抵舊州岸欹入禾黍水仄沿松楸氣
蒸鰕魚毒蔭熱蚊蚋稠遙夜變清候殘更似涼秋村高
月慘慘野黑風修修燈影未掩寨人聲尙行舟良時惜
晚晚芳洲獨淹畱粵中憶陸賈感春未能酬

永淳作

平臯向春夕餘景延清眺經行獨逍遙向往頗幽奧清
燈蠹吏家細樂蠻神廟谿犬吠繁星坡羊立殘燒閒路

轉晴雲空岩閉寒瀑仙童碧印書羽士丹砂竈攀花野
鶴隨采藥流螢導月出相與還山深不可到

隆安晚泊

莽莽古交趾將軍歸義侯戈船竟安在日黑滄江流野
風吹枯火蠻鬼嘯榛邱蕭然山徑雨拍樹飛鶴鷗傳子
定絕域馮公矯兵謀勛名豈往代身賤悲吳鉤

大灘

居風門掩碧雷子赤削烏丸鎮春水雨工入驅河底星
帖帖銀砂伏龍尾青波小港飛魚鴈鰕籬蟹柵相層層
漁人夜臥枕橫石榭葉枳花燒網燈

自二塘至思恩宿佛寺

藍思村徑遙人熟腳踏山花走山腹蕉香不絕吹苦風
清雨灑寒蓑背綠暮投古剎天始晴寺門俯瞰東郊平
枯澗泉淺鴉雀下高原火靜牛羊行寥寥春日悲清遠
壞徑敲橋獨往返老僧齏菜供馬芻走卒捕魚充客飯
一日經過千萬峰竭來臥夢常惺忪息言掩室羨摩詰
鑿山開道哀唐蒙

狀波巖

侵曉登西山近郭無一里春潭百丈深怪石中流起颿
風相盤旋日照不見底泉穴通高峯中有黑龍子清夜

吸月華驚波挂雙尾人聲蒼崖上藥氣白雲裏我欲跨
飛鶴追蹤羨門子

踏歌行

蠻村女兒相踏歌歌起東風吹薜蘿千峯夕照半明滅
照見客船山下過船頭撥浪如噴雪有客聽歌徑愁絕
暮春三月春草長鷓鴣啼花滿楊越昔時豪氣今如何
把酒解憂憂更多忽然月黑歌聲歇涼雨空江飛白鷺
邇來目熟蠻中字耳識侏僂辨倫次官商操切不堪聞
散髮偏髻竟何似四更煙露天始晴星光遙見零陵城
黃蘆苦竹背江去更有清清猿夜聲

長沙

東去長沙幾日還
羈情搖落滿江干
湘靈遺恨猶嗁竹
楚客傷心祇種蘭
水驛星光春黯黯
風舟人語夜漫漫
章華宮殿今何在
猿鳥荒城又曉寒

荊門行

荊門星火天沉沉
古潭流石虬龍吟
長波捲白似清晝
寒聲四月迴窮陰
船旗舒舒尾相亞
涼月蓬蒿照殘夜
山雞亂唳太白高
戰場沙飛木葉下
前日瀟湘春浪多
江花不盡聞楚歌
春光催人發愁思
夢魂北渡滹沱河
人生富貴須行樂
孔甲盤盂不須學
舟人解得乙巳占

金三才不刊卷一
六
曉插風烏看風角

宜城行

滄浪望禹跡東流注宜城宜城時恒寒十日九不晴江
光夜激激決地騰金精霍然落千丈如雷春震驚是時
山月白戍鼓報一更清天無兵氣牛馬盡悲鳴野火下
波濤高風人哭聲我讀五行志頗非漢儒生陰陽適然
耳附會何磴磴金支翠旗下疑有蛟龍行羈旅猶未已
兀兀哀民情

渡黃河作

炎炎山氣生白沙午中日腳飛青霞大梁渴地五百里

六月野田枯麥花黃河西來何蕩蕩萬丈秋隄屹相向
江湖意興益蕭條關塞心情歎悲壯西方日暮天河清
火照青松烏夜驚箕斗流星大如月南風吹下許昌城
我從前年渡清口淮水一石泥一斗河身日長堰日高
何不鑿渠通海艘今年驅車走鞏洛秋汎無期夏風作
暮春河合孟津東老龍下護波濤惡生殺斯民自有神
窮通須致百年身漢家禹貢全圖在王景功名豈異人

題號舍

煙樹城東道芳華過晚春升沉今夜月忠佞幾朝人消
息非文字虛靈漸鬼神遙情滿山海孤立看星辰京洛

無閒歲江淮有逸民風簷長寂寞吹竹夢伶倫

汝陽題寺壁

平原迢遞上斜暉寂歷松杉掩翠微水斷村橋無客過
雨寒沙苑有僧歸升沉異地三秋暮歌哭中年百事非
記取龕燈曾照我此心何日暫忘機

昭州

黯黯昭州路經行獨惘然朱犀眠菑雨青鵝叫杉煙
火歸龍戶高帆下蜚船不堪秋色裏幽景百愁邊

自東小道訪趙神寺僧

幽賞契吾性逍遙步青山翳然松栢下谿煙夕漫漫翠

微有人跡鐘聲在雲閒微月上巖戶僧與猩猩還獨掃
青石榻桑火然秋寒枕經三百卷靈機常內看暢元未
見答抄藥良獨難悵然尋舊徑歸來還閉關

和竹素韻

僑居避人久行徑入山深林屋無全暑崖門有積陰竹
高雙鳥宿潭暝一星臨幽事誰能說儻然寫道心

贈蕭將軍被調征臺灣賊退至廣東旋師

沙場雨黑天雞鳴城頭銅角吹羽聲將軍夜點臨賀兵
夷歌淒淒滿涼野部曲前山洗蕃馬戎衣揖官轅門下
清江西流煙瘴昏飛鳶遙見南崑崙樓船功名今始論

東來羽書賊圍解封侯骨相終須在軍迴海上暮秋時
獨召偏裨問水師

自鳳凰寺登山絕頂

高峯入雲棧怪石相鉤連我來登絕頂日落山寺前西
行盡黑壁飛蘿蓋人煙蒼然見城外厯厯江上船采藥
入林口燒尾明枯泉下有野雉窟時覺岩風羶冥搜未
易歇延眺忘塵筌誰爲結茅宇永謝區中緣

發平樂至陽朔

嶺門榔樹風騷騷臨賀故城天半高猺姬雨種作蘆寨
洞客星居開石窰伐船朝從浦口入慘澹中流日將黑

清霜暗下獨鶴巢野火潛燒老猿窟山根泊時寒浪清
榜人夜食當明星木瘤浸泉苦藥氣石乳挂岩枯筍形
幽景淒淒興無極前頭秋險灘聲急客子淹留惟暫時
明晨更下湘源驛

所居與李松圃先生我園相望賦此以贈先生

亂石成幽徑閒門向野雲林窗秋始見谿桥夜相聞勾
漏無眞藥蒼梧有軼文擬將稽古事尊酒問延君

答松圃先生見和竹素元韻

登臨發清興風景入殘年谿市響餘兩山橋明積煙鳥
言通骨卜蔬食養心禪擬覓丹砂去仙巖夕望邊

杉房留古石，舊壁長孤雲。棲雀雪時見，躍魚風夜聞。星
參臣瓚注，醫解帝鴻文。更擬分幽事，清齋學鄭君。

祁竹軒學使以除夕感懷見贈賦答

山雨夜始急，壁火寒庚庚。慘澹歲將盡，寸心時自驚。賤
子二十餘，鬱鬱負平生。顛上有華髮，蹉跎竟何成。頗習
孫武法，不敢言縱橫。獨嗜韓非書，綜覈實與名。鷹隼望
秋氣，歛然思一鳴。搏擊非其時，吞聲耿難平。世人尙華
士，使君多古情。贈我四十字，戛戛清徵聲。語意有顯晦，
深會殊分明。雲泥今睽隔，何由共王程。感歎係以詩，聊
用報瓊英。

桃花菴贈大醇師

春水橋西路相尋日每斜叩門惟野竹供客只溪茶佛
未參迦葉經能演法華欲將淮海事一爲問龍沙

運河晚行

雙閘閘頭吹暮沙車羅壩前初日斜竹籬背岸著新果
石嶼傍船開野花魚網隔江六七處村春帶雨兩三家
沽來濁酒不成醉臥聽打麥聲啞啞

晚泊遣興

一片秋帆落蒼然暮景澄江禽栖亂石山犬吠寒燈病
淺心無礙神清睡未能空灘明月上風水又相仍

金三石不和
卷一
萬安作

隱隱虔州驛高帆正夕陽江源接閩粵人語雜荆揚沙
竹澄秋氣溪蘭豁夜香何因召龍女還與話滄桑

南雄州

南雄驛在淩江上青石城門紫界牆蠻女和根移茉莉
山童連葉賣桺榔魚鱗屋上朝煙溼雁翅橋邊夕照涼
莫問樓船當日路潺潺秋水向滇陽

英德晚泊

江黑雲低瘴木稠亂山深處是英州荒灘一夜瀟瀟雨
不待天明已白頭

曲江舟次作

涼風吹白沙冥冥瘴江夕清光亂波濤明月下石壁始
興十月中炎蒸未稍息岩花尙芬芬岸蟲猶唧唧微形
慮時徂澹志感物役樵火冬漸繁估舟夜仍急佛理臨
曹溪仙踪近皋石元象庶可求願言謝塵跡

官不出行

清遠縣十月中接官亭下紅燈紅驛夫灑掃不敢歇江
邊探騎何匆匆報道官船今早發已時已過東城東大
舸參差蔽江下峩峩壓波披長風胥吏傳呼盡鞭撻估
船辟易飛秋蓬岸頭知縣垂手立簿丞屏氣如僵蟲是

時空江日卓午只有先生睡如故口渴索茶童不應盡
向船頭看官去日沒城頭知縣回布棚月出鼕鼕鼓道
旁把總巡更行復向官船道辛苦借問官船官是誰舟
人指點回頭語君不見燄燄紅旗一丈長大官眷屬口
巡撫頭船八座夫人船船尾僕婢多如水一歲九遷恩
數稠男兒作健當封侯今年今月作巡撫前年今月南
雄州我聞此言重有憶江西巡撫瑋公弼前年六月朝
天時赤日滿江發船急紅旗散漫爐煙繁江上千官萬
官立送行跪者府縣州司道官高敢長揖賓從歡騰千
里行陸見歸來許馳驛一朝病歿臨淮關去報縣官官

不出

舟抵南海

蒼茫驛路接南夷海上風波晚更移
鵬嶺西來山氣惡
鯉湖東去水情奇荔枝冉冉趙佗冢
杉葉陰陰陸賈祠
王佐霸功俱寂寞孤帆空向日斜時

珠江晚眺

晚潮猶未上春色滿江邊緣瓦
番官屋紅幘蠻女船花
隨鄉思發月共客心懸欲把衣塵浣
煙波又一年

番禺客舍口占

陰陰客舍背江津滿壁蒼苔滿地塵
樓上孤燈聞瘴鳥

街頭斜月見夷人淺深海路行千里冷
暖山風坐兩旬只有蕉花紅不歇隔牆
猶送幾枝春

和雲心七夕詩

星漢近初秋西風見女牛離離深夜
影耿耿故園愁花骨新羅裊蛛絲舊
畫樓寂寥京甸月清恨墜銀鉤

和雲心夜月

城南懸夜月秋色滿長安處處空相
憶年年祇獨看短花垂露白叢桂著
天寒不待清霜日羈愁已百端

和卓海帆秋柳詩懷張船山先生

永豐坊底一株黃憶昔題詩向草堂
搖落酒壚悲漢北

參差鄰笛慟山陽王恭故邸曾春月張緒孤墳但曉霜
三十年來似塵夢重吟秋柳倍淒涼

牡丹

牡丹小宴京塵晚江左開時記畧同畫閣每逢三四月
銀燈分照萬千叢春來感舊知誰在老去看花似夢中
金縷銷沉腸斷久平章門館尙東風

石橋行

石橋沮洳春草清閨河昨夜春水生城根野雀有時滿
沙際橐駝無數鳴東風澹蕩晴絲直坊市韶光映雲日
只有郎官白髮新年年不見春顏色

龍樹菴晚眺

春水浸荒陂蘆葉綠如昨平皋生野煙一里見高閣細
徑取寺門登臨日將落殘雪挂天西參差翠微薄石殿
對松陰繁香閉銅鑰中有東吳僧金經梵音作伊余惜
靈境暮齒念棲託永願結茅菴餘生亦林壑

游李雲門侍郎故園

曾見侍郎游識日重經池館踏晴沙簾櫳寂寞春仍暖
絃管銷沉日易斜四五層陂猶種竹兩三行樹尙開花
年年朝士尋芳到誰惜平泉舊歲華

感閭門舊事

熙春門巷記蘇州水上簾櫳舊畫樓
羅裊暗香金跳脫
紗幮低響鈿篋篋晚花爛漫曾紅雪
新月淒涼久白頭
能得幾回傷往事京華燈火似深秋

夜坐懷清遠上人

夜久忘炎暑開門綠野空
草香知積水蟲語覺微風
薄俸貧難待祥刑道已窮
蓬廬倘相借飛錫逐支公

和海帆西直門外卽事

白石銀河接上台紫雲金闕望蓬萊
建章垂柳參差見
太液新荷次第開舊日皂雕馮翊在
今年名馬大宛來
時清不奏防邊策朝退看山月幾回

金三才集卷一
軍機直房遇張詩舫卻贈

左掖聽籌正趨走承明簪筆更經過
紫衣香拂宮花遠玉珮聲迎御柳多
應笑汪倫夢宛口卻逢張緒在靈和
舊來同向絲綸閣池上新詩近若何

哭謝三牧之

弟兄羈旅官仍在冠蓋崎嶇夢幾場
十載刑曹空落拓一麾蠻徼太荒涼
南漳屢念劉公幹北海曾悲盛孝章
欲把平生更追憶天涯孤櫬與斜陽

元方早宦共蹉跎法護中年哭輶軻
百口江干生計少一棺泉下故人多
孤兒山縣君難見舊宅天街我尙過

夕照寺前東潞水白頭相向愴流波

西曹夜值

期會厭於衙舍宿文書愁被吏人催
兩甌瓜液心初定一枕槐陰夢未回
廳後鬼煙籠燭暗牆陰囚血浸花開
金吾驍騎三更到卻喚都官對簿來

長歌

月映沙垣檣葉赤涼燈白燄天根黑
舊畫三年掃壁塵花枝尙似江南北
西曹惻惻鳴金風昨日錄囚槐蔭中
隸卒呼名跪階下撲地琅璫摧血紅
法司勾檢食天祿似獸充饑噉人肉
李惺律旨空巉巖霜雪侵心不能讀

細草京門吹綠煙秣陵夕夢秋茫然莫愁湖畔好雲水
可惜買山無一錢

題徐秋潭將軍詩稿後

西域新詩紀太蒙將軍兵在白蘭東大宛苜蓿秋河遠
突厥篳篥暮嶺空勒石不煩班固作雅歌能與祭遵同
草堂祇在江南北擬築郊居候鄭公

鐵盂居士存稿卷之上終

鐵孟居士存稿卷下

儀真汪全泰大竹著

鴛湖王

相惜菴輯

和雲心早朝

諸曹並侍天階上
列宿遙明御仗前
太液曉晴風色定
建章秋暖日華圓
旌麾舊第臨黃道
劒珮新恩拂紫煙
獨有季鷹憔悴久
鱸魚長憶晚江邊

秋夜間歌

邏迤檀槽夜夜聲
江南平調最分明
西鄰不識劉賓客
誰遣何戡唱渭城

寄祁竹軒中丞粵西

瘴林煙嶠綠嵯峨開府天南想玉珂赤微行春新節鉞

烏蠻拱日舊山河

中丞丁卯年會任粵西提學

石棋曾聽談臨桂銅

柱親看咏伏波二十年前鈴閣下祇應王粲記經過

灘南湘北水潺潺再見樓船上百灘司寇霜威千里到

中丞風節萬人看賓僚定有新時彥郡縣應無舊屬官

知向韋廬重駐馬青楓門巷海天寒

謂李松甫先生

銅鼓高樓白日閒交州驛使向長安新秋卻奉陳公札

舊吏仍憐范叔寒南國波濤懷故里西曹霜雪感嚴官

公卿滿眼誰相念手把瑤函著意看

少年幕府曾趨走畫燭清尊滿節堂豈意蹉跎成卜式

更無經濟似馮唐半生詞賦身如葉入口飢寒鬢已霜
今日白雲亭下路春風猶自望甘棠

潘紅茶布政話舊作

北風天北雪滿眼彰義門東歲華晚使君六十猶少年
鬚眉甚澤顏色鮮超然好道有仙骨能使金華出筋脈
達官向日守紫薇內景何人訣黃石豫章舊泊沙水繁
值君佩印乘高軒短衣握手走相見風掣大旗開兩轅
偏廳對飲燈燭亂羈客將行奴隸喧殘月層冰屢追憶
酒酣夜出章江門十載幽憂慟懷抱慘澹先塋拱秋草
箭鴈心摧一人在隙駒骨痛諸兒天只今落拓居曹司

白髮空齋散衙早京西夕照翻黃榆萬屋參差故人少
壯年蹤跡潛悲辛倏忽舊遊三十春雄譚快謔斷忌諱
意氣曾千千丈塵長安花開二三月天街絡繹鳴朱輪
豈無宴飲似疇昔依阿世法長逡巡近聞吳楚大飢水
倉卒黎民背鄉里宣撫流亡南紀同陽和詔勅東山起
自甘元字終寂寞祇合丹砂就園綺戔戔節鉞朝玉京
尋我焦先石巖裏

卓海帆太僕江山縱覽圖王石谷寫於天闕放眼
樓者

金陵城南八月潮石頭北接天闕高危樓縹緲抱日腳

老崖光景窮秋毫畫師李范俱久沒近者王翬有神骨
放眼能同峴首情會心每向營邱得江東千里何蒼茫
登樓縱筆圖縑緙眾壑盤紆插地黑長波浮濤摩天黃
忽看細路交田轉復著空邨茅屋淺溟濛叢樹拂霜低
敲側孤帆帶雲遠短燭生綃坐蕭瑟少壯扁舟倏追憶
灘渦日日傍山來磯背程程截江出中間洞庭與鄱陽
白沙暮接青草涼沃焦東望海鰲口虎牙屢泊西宜昌
三州隱見秋色改六代興亡夕陽在水墨陰森已百年
風煙浩蕩空千載太僕故鄉臨劒門銀濤灩澦蒼巖昏
赤甲白鹽控地脈瞿唐灩預迴天根層潭疊嶂居險要

州嶼東吳形勝少何人繪作岷山圖歎息王生不會到
我探禹穴登會稽瀟湘浮舵窺九疑平生蹤跡追司馬
惜少丹青顧愷之

顧愷之有瀟湘九疑圖

送白七使西安

虎節嶢關路萬重使君年少五花驄冰船負弩過臨晉
雪驛鳴笳向武功秦魏山河春草在漢唐宮殿夕陽空
東歸試訪希夷峽一卷陰符太華中

偶成

河經泗口波濤緩閘改畱城壅滯俱鄭白不聞開水利
褒斜仍見議漕渠謝莊能製山川式王景空摹海岳圖

只與太玄同醬瓿秋風憔悴白髭鬚

寄潘紅茶雲南

昆明金印舊嵯峨近日黃庭注若何南海故人長貴達
西曹散吏少經過濮髯千寨春風早蒙段諸山夜雨多
黑水伏流應得見因君還問葉榆河

癸巳三月三日

三月初三東郭路白河蕭瑟叫鷓鴣曾聞荇葉搖紅艇
不見桃花宿鈿車官壠淒迷風漸滿旗田荒暖日初晡
江南徧是蒹蘭水尙有春人憶舊無

珠巢街觀音院

西山二月生晴霓街南匹馬風淒淒纔交邨口野花發
欲入寺門山鳥嘯舊址蔬籬在岐路往時茅舍臨荒谿
昨聞畚鍤古原上更開亭榭平林西高捫蒼蘚過石壁
下踏黃蘆行水畦冥冥空苑晚沙闊慘慘繚垣春日低
參差柳眼未飛雪厯亂荷根纔著泥畫幔神祠覆火鴿
叢燈佛閣明金猊寓客番冠近巫覡老僧蠻語如鳬鷺
自笑形容已衰老卻隨魑魅相攀躋猶勝五刑校地獄
不如一鉢忘天倪森然龍象在胸臆寂寞詩篇空自題

太原溫尙書寶刀歌

君不見溫尙書荊州刀金精浩蕩明秋濤經畧額侯昔

所佩西征殺賊腥風高額侯病歿江口贈刀笑把尙
書肘但言川陝未休兵謀戮鯨鯢在君手尙書駐馬興
安城晝夜加環龍虎驚提兵大小百餘戰黃河西路煙
塵清豐貂冠上珊瑚赤翠管花翎映寒日腰懸綠鞘鼓
角鳴秦蜀軍功功第一汾水西流秋月明太原墓上秋
草平公子華筵飲我酒令我歌作寶刀行老夫膽壯頭
已白八閩今年海氛急蕭條兵畧滿胸中歎息樓船不
相識

春草

拾翠金隄小裊紅裙腰纖細舊東風如何綠遍江南路

祇有秋墳在夢中

贈晉漁

居近馮煖宅相尋屢見過閒門故人少今日達官多秋語及芳草夜燈明白荷與君悲尺籍歸棹意如何

處世

處世但留雙鬢雪應官惟少一囊錢荒涼舊屋三千卷落拓諸曹二十年鄒衍談天窮鬼怪大章區地作山川近來畸士經過少日向檣陰坦腹眠

湖船曲

鎮淮門北湖船早江南六月揚州好十里亭臺晚燕嘯

四更歌吹秋螢少湖上夜來明月多月色繞船明綠波
叢叢水檻亂銀燭處處風簾雙翠娥櫻桃繡著吳衫淺
茉莉珠垂越鬟暖韓壽襟前香未銷秦宮枕畔花仍滿
翠閣朱樓厭起居雕盤綺食逐歡娛縱橫未值沙吒利
調笑肯妨馮子都金谷芳菲不相待玉鉤池館須臾改
淮王桂子何處尋煬帝瓊花幾人在廢宅荒園海氣涼
絕纓投轄恨茫茫已經畫角悲南浦不道鈿車上北邙
誰遣繁華坐銷歇空城白日寒如雪劉晏猶傳改度支
孔宣詎善持鹽鐵衰草層雲廿四橋千門萬戶雨瀟瀟
莫問行人揚子驛只今惟見廣陵濤

聞江南秋雪開桃花

淒淒窮巷午陰斜瘦骨霜髭撲面沙捫蝨無人識王猛
放麋何日用秦巴五陵冠蓋將軍宅三省軒鐘宰相家
不問流亡江左路滿城秋雪見桃花

著眼

桃葉家何處梅根恨杳然亂花秋似夢殘燭夜如年著
眼新簾幙驚心舊管絃當時涼月在猶照女牆邊

畫船行

三月畫船思故鄉綠波照眼春茫茫雷塘柳梢十餘里
千萬撲船蝴蝶黃金尊酒酣日將暮高筵紅燭三兩行

月出東風屢澹蕩美人珠翠生繁香當時光景能追憶
佳節長安久蕭瑟山陽蹤跡感平生況聽東鄰弄長笛
纔過寒食五六朝孤館嘯鶯似江北桃花不是息夫人
相對空簾少顏色

耆介春尙書孫過庭大硯歌

孫生大硯千餘年尾箕燦爛明秋煙縱橫二尺斷巖脈
蟾蜍滴水長新鮮當時臥病邛山宅著筆還如永嘉石
飛騰草草萬人看索靖張超少顏色峩峩雅頌耆尙書
垂名玉牒朱輪車羽林諸曜映驄馬辟邪白晝鳴金吾
汝陽材藝真無敵墨器遭逢倍珍惜參差寶匣抱珊瑚

不數黃金萬千鎰君不見楊雄鐵硯漢製良河內得之
劉守璋右軍石硯世希有復入山陰老人手只今文苑
屬天家並與前賢傳不朽瘦書鑿背何崔巍硬黃搨本
蛟螭迴周人科斗硯銘在我讀太公金匱來英豪蹤跡
悲長往蒼碣森然照叢莽

陳子昂曾爲
過庭墓誌

只是沉淪草澤

人古岸風日誰相賞藤角高懸海嶽青尙書拂拭感幽
靈九州不少輶軻者豈獨嵩陽孫過庭

天津橋酒樓

酒樓二月半柳芽鶯已曉春風石橋北白日向人低平
生重意氣咄咄千虹霓擊筑滿燕市酒徒空爾爲昨日

黃金臺醉策句驪馬步出城南門寒離起平野蕭蕭易
水西萬古長城下不逢高漸離獨自悲歌者

中頂東嶽祠題壁

天齊古祀自周漢臨淄淵水當龍湫太公八神最爲貴
靈旗法鼓喧荒邱秦人會稽並海上燕船風作離瀛洲
僊人大藥失所在歷歷叢祠空九州遶殿頽雲向長晝
泂溪落日如清秋野人踞石浴蒼狗健婦插花騎白牛
荒涼時饗煙景異雜沓農畝香火稠塵漬衣冠暫瞻仰
水羞蘋藻仍淹畱我登日觀五十里曾聽松澗鳴飈飈
只今衰老能想像金雞叫嘯天東頭安期羨門屢相接

踏踏郊原悲舊游
躬耕二頃不可得
梁甫哀吟今更休

秋夜聽簫

寂寞荒園聽晚簫
半牆斜月夜迢迢
西風白髮無窮恨
何處江南廿四橋

白髮

閩粵兵戈日瘡痍
百萬人朝廷須衛霍
州郡望甘陳歸計
清江遠生涯白髮新
雲中誰薦達風雪映閒身

送梁碧君之廣東

珠海從戎晚何人
說村侬孤舟經島嶼
落日見兵戈白髮
生涯少青山故里多
南風試回棹春色滿湘波

城陰

寂歷城陰路鳴鞭度石濠
千家殘雪遠孤塔夕陽高
春色兼籬落人煙帶桔槔
涼風催倦眼歸夢過東皋

尺五山莊

貴家池館接新豐白髮重來萬感中
風掃燕泥山閣在雨喧蟲葉水亭空
金櫳舊見邀青鳥玉砌曾聞躍紫驄
今日板橋無客到野蒿零亂夕陽東

河西驛

迢遞河西驛龍灣向夕過松陂
秋雨亂茅屋夜燈多孤矢猶東海
芻茭更北河間雞同越石垂老惜蹉跎

楊村

南蔡邕南老更過西沽西去接滹沱瓦亭迢遞臨空岸
石壩荒涼向舊河陂外樵船秋水闊橋陰漁網夕陽多
秋原何處高間冢今日雄材只輒軻

舟次交河聞岸上歌聲感賦

少年衝雪下交河驛館蒼涼匹馬過挾瑟昏燈尋趙女
吹簫明月憶秦娥青山不改離情在白髮重來舊恨多
傍岸柳枝誰更折水牕猶唱定風波

東昌

魏水茫茫繞郡過弁山晴望更嵯峨風煙西接唐三鎮

城郭東開夏九河宗澤功名館陶在臧洪氣節廣陵多
牟州攻守無良策手把孫吳惜輒軻

重九日邳州作

莽莽孤城感歲華一帆迢遞遶湖沙已將移宅同桓景
更欲參軍學孟嘉泗水風生聞白鴈碭山雲起見黃花
荒涼戲馬臺前路萬古扁舟日又斜

太平江行口號

叢蘆衰草接江天重過龍山二十年小艇兩三寒雨裏
空罾千百暮潮邊劉琨半夜悲徒爾宗慙長風歎適然
榮落古今東逝水滿頭霜髮枕書眠

泊和州晉魚口

沙際和州路晉魚舊口門晴風催野艇寒日晒江邨晉
壘尋孤堞吳兵記故屯空餘雙白鷺煙草自黃昏

寒潮

寒潮東望接煙塵千里扁舟百感身深夜空江只明月
亂離消息問何人

江行感賦

江南山色夜青青江北船燈數點星兵氣荒涼殘月裏
諸公何處泣新亭

彭澤阻風

白髮扁舟裏黃昏蠡澤東山城寒帶雪江市暗兼風尺
籍官猶在臯比道欲窮不煩漁父問蹤跡已蘆中

二月十日白漢口放舟晚至赤壁宿

東風昨夜江邊宿侵曉野梅吹簌簌不知春色從何來
但見千峯萬峯綠去年西過長風沙今年歸舟潁水斜
漢皋神女夢中見空祠爛漫開桃花前頭赤壁波如雪
戰鼓當時鳴不歇茫茫青草白沙洲吳魏江山但明月
夜半不眠憑水牕拍拍野禽飛一雙曙星未落榜人起
更挂孤帆下九江

江北山店夜宿見月

月明深夜後人在亂山中一畝荳花露滿牕杉葉風翻
翻墮簷雀唧唧上階蟲滅燭聽溪水清吟昨晚同

壬寅六月初八日夷氛入圖山關至鎮江揚州大
亂避難北征行至邵伯舟中作

夷氛入江口烽火接揚州警報傳斜日空城似晚秋亂
離經野市衰病泊孤舟一宿漁燈裏飄飄似海鷗

掃門

掃門當曉日蟬噪已清秋草色明甗巷槐陰落瓦溝渡
江聞散卒防海見空舟何處追韓信叢祠向楚州

六月

六月西風早秋雲忽已高
楚城明葦葉淮日隱松濤
火照金陵渚兵摧鐵甕濠
猶聞新大帥河上駐旌旄

咄咄

咄咄書空恨悠悠避世心
愁兼秋樹亂病與夕陽深
蘚壁朝陰早蓬門夜氣侵
親朋長不見多難更相尋

鄉井

鄉井人何在戈鋌日又曛
衰年兵裏過亡友病中間
亭掃吳天月蝗飛楚澤雲
關山千里道何處不離羣

世事

世事已如此悲歌將奈何
生存千戶少離亂一身多
落

日明叢嶺西風響大河蕭蕭南北路無復片帆過

寂寞

寂寞干戈外羈孤老病中有時同夜月無地避秋風鄉路應難到家書久不通近聞增歲幣魏絳已和戎

滕縣道中

秋田一片綠幾樹晚蒼紅孤客水煙裏半村山翠中雙車隨夕照九日向西風欲詠幽詩句栖栖道已窮

自蘭陽渡河入大梁作

中牟六月黃河決蘭陽隄下河流絕西風猶作怒濤聲捲起殘波赤如血大梁城上見孤雲千里沙隄又夕曛

寂寞夷門今日路人間何處信陵君

青陵臺

明月出黃河照見青陵臺東流與別恨萬古不能迴沙隄下有相思樹開遍野花隄畔路年年蝴蝶逐秋風恐有英魂共來去

大梁旅館

博浪城西萬斛沙長街寥落日初斜著書空見虞卿宅
敝舍難尋郭解家遠志幾叢孤宦草來禽兩樹異鄉花
黃河更值秋風起愁向夷門聽晚笳

夜宿黑垆口

旅宿金隄上河燈夜更清月高槐柳氣風定馬牛聲
舍餐常晚蘆牀臥到明一官悲白首寥落向秋晴

閒居

閒居河上久春事又相仍水影蘆灘月人煙草舍燈
官如異鄉客身是在家僧欲注楞嚴義塵勞淨未能

中牟道中

煙水中牟道輕車繞決河寒風渡牛馬殘日下黿鼉石
壘官衙遠沙埋殿佛多亂離同戰伐垂老畏經過

防河

波濤春又濶滿眼暮山青一縣魚龍氣千官草木形空

郵畫星斗荒藪祭精靈誰識河源委茫茫岳瀆經

河津

水口春光滿萋萋物候新殘陽十二月曠野兩三人瘦
馬嘶風久飢鳥掠地頻荒寒餘白髮猶自向河津

丙午春初臥病大梁蔚卿過慰良譚遂深夫生老
病死人之常也受想行識淪胥以歿聽遷化於
自然詎足論耶於時送客旣去空園寂寥夕照
灑人寒在心背俄而西風驟起薜荔先鳴山鬼
欲出冥塵四飛迫人蹤稍定微月東升天邊曠
黑州郡蒼然千萬名場悉成夢界觀夫光陰造

金三才集卷一
下
化如是无常氣血微軀烏乎久恃回思京城曩
昔游譙厯然心目已數十年尊甫諸公次第泉
下當時冠劔無一存者獨畱衰骨俯仰人間豈
靈光之歸然抑日及枯枝未值虞淵返景爾嗣
宗懷人蘭成思舊撫今追昔夫誰知者以此言
哀哀何極焉詩二篇以貽蔚卿異日陳迹復移
於斯文追論今之感歎者又與風煙共幽壤久
矣

往來愁病似江潮數卷金經暮復朝寒月影邊成獨客
疎鐘聲裏近元宵一官岐路空惆悵八口貧居更寂寥

惟元暉猶過從烏衣門巷共蕭蕭

王謝堂前記屢過流光回首太蹉跎簪纓散後青山晚
親故已來白髮多修竹廢園惟落日亂花孤館又黃河
冷齋夜話無人聽長憶春風舊永和

鐵盂居士存稿卷之六終

大竹太守劍潭先生嗣君也以名進士官比鄩曾一出
守閩中卒於東河孔君宥函稱其詩奇秀天成光氣奪
人神魄嘉道之間殆罕其匹太守舊與慈雨吏部至交
編入友聲亦珠聯璧合云甘岩王襲之謹識